

Takurda-o Burus ayoore-o o wu gene Timoti

Rem-se r̄o n-me à:

M-zante 1:1-2

Ur-bongon, un do ye un jaab-o ur-hur ne 1:3—2:13

Ya-ut-ma ur-kewes ne 2:14—4:5

Ma-ut Burus to un hi un de un wu 4:6-18

Ur-kom 4:19-22

Ur-gas

¹⁻² Timoti, me Burus, ko-yan-tom Kiristi* Yeso, ro wo genen ka takurda-o. Me Burus, ko-yan-tom Kiristi Yeso, remen Shir conog kaane. Shir tomog me, um ko'ote ma-to un swor o-nu o un hoog. Ka hoog-o ro be-ur Kiristi Yeso.

Timoti, wa re, me m-was un wo ne deen. Me us-kon Shir Tato na un Kiristi ne Yeso Wan-Koyan na rem ru. Me us-kon wu kutu wo yar-mo Shir, wu gut wo ur-'won ne. Komo wu 'ye wo gwugwu-mo ur-hur.†

*Burus doote Timoti jaab-o ut-men,
wu nomot senge-mo Shir ya'ase wu à*

³ Me m-bom un Shir, wu me m-nome m-guw à. Bo tat-ne re ye n-ga nome wu m-guw à, um nomotu wu m-guw un hur-ur gaan. Koyanda me ro us-kon rem ru, m-how, m-tet ne, me un bongon-de Shir. ⁴ Me bakse naase-mo un men-ut ru, un yish-m ru ne, da-o a caage à. Me m-hoge un reeb-o un hyan-o ru komo, remen um nak woa ru zak-o hoot me. ⁵ Um bakste unze o shereg be-ur Yeso Kiristi, un hur-ur gaan. Wu mate inu ru Yunis à, un inu un wu, Royis,

* B̄or-o gaan:1-2 1:1-2 W̄u Shir daagne à. † B̄or-o gaan:1-2 1:1-2 Hyen komo: Seng 16:1.

ye ba'ag wɔ m-sher un hur-ur gaan. Um dek un hur un de, unze o shereg be-de un wu tomso ne. † 6 Remen kaane o, me wɔ m-bakse o nom m-'wɔns un ka myot-se Shir ya'u wɔ à, tomso ne, o ma'as un nom un senge-mɔ Shir ya'u wɔ à, kom-ut yoor. Da-o um huu wɔ kom-to o-kwum à, Shir ya'ag wɔ beeb-de un nom un ka senge-mɔ. 7 Me un zee kaane remen Kukt-o Shir ya'u na à, o na m-rwɔ a hogute o-gyer á. Amba o na m-'ya ur-beeb de un guw-mɔ Shir, un was un hun-ne ne, un bɔ a he garamse un hi un na ur-bon ne à.

8 Remen kaane, wɔ hoge 'e-mɔ un rwor un ma-ut Wan-Koyan na á. Komo wɔ hoge 'e-m re, me wu a ka'e remen Wan-Koyan á. Amba joose un me ne, be-de un swɔ ur-koob remen ka Ma-to m-Rerem to. Shir a 'ye wɔ 'wɔns-mɔ m-nom kaane. 9 Shir guug na, wu bandu na, a she'ette she'et-de un ba m-kukop. Wu un band na, yanze remen senge-mɔ ur-bon mɔ a m-nom á. Amba wu un band na, remen wu un hi un de un wu zongsute wu nomot kaane, komo remen wu kututu na yar-mɔ Shir un ka bu-yo. Rii-yo Shir nomot hono o-dak, wu kututu na yar-mɔ un wu, un bu-yo un tom un Kiristi Yeso un ka dak-o. 10 Amba m-moka, Shir kutute na yar-mɔ un wu, be-de un haan-m Kiristi Yeso Wan-Gwu na. Yeso wu saburse 'wɔns-mɔ m-mar. Komo da-o Yeso ruru na Ma-to m-Rerem à, wu kutu na ka hoog-o ba m-ta o cas. 11 Remen ka Ma-to m-Rerem to, o Shir daaguntu me. Shir un daag me um waragte koyan-ko'ot un Ma-to un wu, ko-yan-Tom Yeso, un komo wan-yoose un hun-ne ne bɔ a he dore un Yeso Kiristi à. § 12 Remen me un rure hun-ne Ma-ut Yeso Kiristi, o rwɔ'e um rotte m-swɔ ur-koob kane ke'o. Amba myet un kaane ne, me m-hoge m-'e á. Remen um nepste un wu um sherte

† Bɔr-o gaan:5 1:5 Hyen komo: Seng 16:1.

§ Bɔr-o gaan:11 1:11 Hyen

komo: 1Tim 2:7.

à. Komo um nak wua was un me ne, un kap rii-yo wu yase me ur-gut à, har ha-mo un ká ho-de un piish ut-ma de.

¹³ Bop ka yoos-de o-nip de, kom-ut yoor, ka de o hoge be un de à. O dore sha-mo un yoos un de. Nom kaane m-sheer, m-was ne, mo Kiristi Yeso ya'su wò à. ¹⁴ Bop ka yoos-de o-nip de kom-ut yoor, de Shir ya'su wò à. Kukt-o Shir o rò ur-she'et n-me un hur-ur na à, oa gu na m-was un ka yoos-de o-nip de ne.

¹⁵ O nepse unze yan-dor Yeso kap, ye rò un dak-o o-Asiya tukute me o-cin. Har un Pajerus ne un Hamojenis ne, ye tukute me o-cin.

¹⁶ Me us-kon Wan-Koyan kute yan-hur-o Onesiporus ne 'won-de un wu. Me us-kon kaane, remen koyanda wu rò me un 'ya un jaab-o ut-men. Komo wu hoge 'e-mo m-haan wu hyenet me ke'o á. ¹⁷ Amba bo wu woone bo-o o-Roma à, wu hooburu me ba m-naas o-da, se da-o wu hyane me à. ¹⁸ Remen kaane, me us-kon Wan-Koyan kute wu 'won-de un wu un ka ho-de un piish ut-ma de! Wò un hi un du o nepse, da-o um ro un bo-o o-Apisu à, wu guug me.

B̄or-us yoor

Ko-karma Yeso Kiristi, wu o-nip

¹ Timoti, wò untun wà re wu. O ma'as un nom un jaab-o ut-men be-de un yar-mo Shir, mo Kiristi Yeso ya'u wò à. ² O hogute me un yoose un hun-ne ma-ut Kiristi. Um yoosute hun-ne ka ma-to un co-o un ya-us-tor deen. Um conog o yoose hun-ne ye o-nip gon ka ma-to. Ye he mhoks un yoose un ye ken hun-ne komo à. ³ Nom ur-joose un te ne, be-de un swo ur-koob, untun ko-karma-wu ur-bon, wu ma Yeso Kiristi. ⁴ Ko-karma ro'e be-de un senge-mo un wu. Wu rò m-rwo un hi un de un wu, n-me un rem-se rò se un karma-ne á. Amba con-mo un ko-karma

m̄o, w̄u ru wan-co o un w̄u hoge r̄erem-m̄o un w̄u. ⁵ Ka r̄o tomso n̄e be-de ut-mur, yatt-w̄u a he m-aag o-keeg á, se w̄u dorute jor-se un ka mur-to. ⁶ Ka r̄o tomso n̄e ko-wa-o-kat w̄u nome senge-m̄o un w̄u bo a cone à. W̄u depe w̄u be m-kum kwukw̄ur-de un rem-se o-kat. ⁷ Nom us-barag un to ka ma-to um gendu w̄o à. Urege o nomog kaane, Wan-Koyan w̄ua 'ye w̄o us-nap, un ka ma-to kap.

⁸ Baks un bo Yeso Kiristi r̄o à. W̄u Shir 'yonse ut-marimar à, w̄u rwuune un baag-o Dawuda à, ka Ma-to m-Rerem to, to ma Kiristi, to me m-ko'ote un hun-ne à. ⁹ Remen me un ko'ot un ka Ma-to m-Rerem to, o hante um rotte un swo ur-koob. M-moka me ke'o untun w̄u nome ur-ba'as à. Amba yatt-w̄u he hoks m-gaag un Ma-to Shir á. ¹⁰ Remen kaane, um nomog ur-joose un swo ur-koob un ko yo ke rii-yo. Um ko'ote ka ma-to, remen hun-ne ye Shir daage à. Remen ye, un ce un ye, ye kumut gwu o a m-kum be-ur Kiristi Yeso à, komo ye cuw be-de un ka seps-m̄o un ba m-ta m̄o.

¹¹ Ka ma-to nip-o, to r̄o m-zee,
Urege net marag un Kiristi,
w̄ua nom m-hoog un Yeso ne tomso ne.

¹² Urege net nomog ur-joose un swo ur-koob rem Yeso,
w̄ua nom ut-gwomo un Yeso ne.

Amba urege net nomog she-m̄o un nap un Yeso,
Yeso a nom she-m̄o un nap un ka net-wu.*

¹³ Urege net ko-wa-o-nip-w̄u be-ur Yeso á,
Yeso r̄o m-barme á, w̄u r̄o ko-wa-o-nip.
Remen Yeso a nom she-m̄o un hi un de un w̄u á.

*Ko-ya-m-senge-w̄u Shir r̄o m-hoge
un r̄erem-m̄o un w̄u à*

¹⁴ O ma'as yan-dor m-bakse un ka ma-to um zee à, komo o nek ye ut-to remen Shir. Taase ma-to sunu ye, remen yo

* B̄or-us yoor:12 2:12 Hyen komo: Mati 10:33; Ruka 12:9.

gom-ut r̄o m-zee à. Remen gon ka sun̄e-m̄o ut-ma m̄o r̄o m-hante rem-se o-hwaa. Komo t̄o r̄o un̄ hante un̄ naase-m̄o ut-men be-de un̄ ye r̄o t̄o m-hoge à. ¹⁵ Nom̄ b̄o un̄ nom̄ m ru, b̄o Shir hette m-ho'os o-wur un̄ w̄o ne à. O warag ko-ya-m-senge, wu r̄o m-hoge 'e-m̄o un̄ senge-m̄o un̄ wu á. Komo o ma'as un̄ yoos un̄ gom-de o-nip hond hond. ¹⁶ O som nom̄ un̄ ma-t̄o o-hwaa t̄o un̄ ba ur-hi. Hun-ne ye r̄o un̄ nom̄ un̄ ma-t̄o o-hwaa à, r̄o m-warag yan-koob-de o-dorotte o Shir. ¹⁷ Yoos-de un̄ ye r̄o m-ha k̄o kene untun caari-o o-nat, o r̄o m-ti un̄ ap-m̄o o-wur à. Himeniyus un̄ Peretus ne, ye r̄o un̄ gon ka yoos-de. ¹⁸ Ka nen yoor-ye, yagute sher-m̄o o-nip m̄o ye rotte à. Ye zee unze Shir be'este wu 'yonsute yan-dor ut-marimar. Remen kaane, ye r̄o un̄ rwo un̄ ye ken yan-dor ye yage m-sher be-ur Kiristi. ¹⁹ Amba hun-ne ye Shir sa o zee shi'it-de r̄o m-nukte á ye r̄o. Be-de un̄ ka shi'it-de Shir geneg: “Yawe nak hun-ne ye r̄o ye ma un̄ wu à.”† Komo Ma-t̄o Shir zee, “Da-o wu ken, wu zee ye, ‘Yawe wu r̄o Wan-hur re.’ Ka net-wu, se wu yage nom̄ ur-ba'as.”‡

²⁰ N-me un̄ den-o un̄ ko-wan-hwor, sheend-ut r̄o kon t̄o un̄ mà-t̄o o-zinariya, t̄o ken sheend-t̄o r̄o kon komo t̄o ut-ba. Ka sheend-t̄o o-zinariya t̄o, hun-ne un̄ ess-t̄o remen senge-m̄o un̄ h̄o-de o-biki. Ka t̄o ut-ba t̄o ne hun-ne un̄ ess-t̄o remen senge-m̄o un̄ h̄o-de o-hwaa. ²¹ Kaane r̄o be-de un̄ ko-yan-dor-wu wongse hi un̄ de un̄ wu be-de un̄ ka rem-se o-hwaa se à, wua warag sa o zee sheend-t̄o Shir esse remen h̄o-de o-biki à. Wu waragte ba m-kukop, Shir a hoks nom̄ m-senge un̄ wu ne. Komo zongse wu r̄o remen wu nomot k̄o m̄o ke gon senge-m̄o ur-bon m̄o.

²² Timoti nom̄ ja, un̄ nom̄ un̄ rem-us yo-se ne, se yan-camp̄o-ne r̄o m-con m-nom̄ à. Ma'as un̄ nom̄ un̄ rii-yo r̄o

† B̄or-us yoor:19 2:19 Hyen komo: Oog 16:5. ‡ B̄or-us yoor:19 2:19 Hyen komo: Isha 52:11.

so-yo à. Senge m-sher be-de Shir, m-was ne, un she'et-de ba ut-ween ne. Nom un gon ka rem-se, un myet ye ro us-kon be-ur Wan-Koyan un hur-ur gaan à. ²³ Da-o hun-ne ro un sune-mo ut-ma to o-hwaa to rotte ur-hi á, o nom ja un ye ne. Nom ja remen wo un hi un du o nepse gon ka ma-to ro m-hante ut-ween. ²⁴ Taase wan-senge-m Wan-Koyan wu ma'as un moor-to ut-ween á. Amba wu gut kowan un gwugwer-mo ur-hi ne, komo wu hoks m-yoos yo Ma-to Shir zee à, un mo un hur-de un wu ne. ²⁵ Ka da-de, n-me un gwugwer-mo ur-hi, wu kewes ye ro un yage-to un yoos-de un wu à. O ken da-o Shir a 'ye ye o-da, ye waktune be-de un wu, ye nep yo nip-o ro à. ²⁶ Ka da-de, yea muun un barag-se un ye, ye kumut m-posse be-de un ceeb-o un ko-Gwomo-wu un ya-ut-kot. Wu ro shikke ye un o à, remen ye nomot yo wu cone à.

Bɔr-ɔs tet

She'et-de un hun-ne un kom-de o-da

¹ Timoti, um conog o nep unze un ho-to ur-kom, hun-ne a su ur-koob deen. ² Yo rwo'e um zeet kaane à, remen: Hun-ne yea ma'as yan-con-to un hi un de un ye temb.

Yea ma'as yan-con-to un hwor,
 Ya-us-ses,
 Yan-nu-mo ur-hi,
 Ya-ut-reeb,
 Yan-koob-de o-dorotte o un ye mate ye à,
 Yan-nu-se un o-kiit,
 Yan-koob-de un gyero Shir.

³ Yan-koob-de m-was un hun-ne ne,
 Ya-m-ees un or re un ye ne ur-hur,
 Yan-we-to hun-ne,
 Yan-koob-de un garamse un hi un de un ye,
 Ya-m-zwom,

Ya-ur-shoob un kap rii-yo r̄o s̄o-yo à.

⁴ Ya-m-re o-ra,

Ye r̄o un n̄om un rii ba m-ceker un yo he m-kor à,

Ye r̄o shiishe un nu-m̄o ur-hi ne,

Yan-con-t̄o un hoge un r̄erem-m̄o un hi un de un ye
ar̄ge con-t̄o Shir,

⁵ Ye r̄o m-n̄om sa o zee ye un dorotte-o Shir. Amba ye
m-con Shir ja'as rem-us yo-se, se ye r̄o m-n̄om á.

N̄om ja un ḡon ka hun-ne ye ne.

⁶ Yo rwo'e um zeet o n̄om ja un ḡon ka hun-ne ye ne à,
remen ye ken ye r̄o m-raks hun-ne remen ye tuwut hur-
t̄o un ye. Ye m-n̄om un kaane remen ye gamsut̄e ne'a-
ne ye m-raag. Ka ne'a-ne ye ba'as-ut daag un hi-t̄o un
ye, komo con-t̄o un n̄om un rem-us yo-se gamsut̄e ye.

⁷ Koyanda a r̄o ye m-yoose, amba myet un kaane ne, ye w̄o
m-nap un yoos-de o-nip á. ⁸ Ye r̄o untun Jenis un Jambaras
ne ye nome Mosa ur-shoob n-ga n-ga à. Ka b̄o-se o, ka
hun-ne ye r̄o ur-shoob un rii-yo r̄o o-nip à. Barag-se un ye
rott ur-bon á, sher-m̄o un ye komo m̄o ut-b̄o m̄o.* ⁹ Amba
yea hoks raks un hun-ne un ya o-da hiin. Remen ba m-
jime deen, kowan he m-hyan un rem-se o-hwaa se un ye
cas, untun b̄o kore un Jenis ne un Jambaras à.

Burus nak Timoti ut-to

¹⁰ Amba w̄o, Timoti, o nepse ur-bon ne, yo me m-yoose
un hun-ne à. O nepse komo b̄o um nome she'et un de à. O
neps yo um cone um nom à. O nepse um shereg be-de Shir.
O nepse me un 'm̄o ur-hur un hun-ne ne, komo me un was
un hun-ne. Komo o nepse um joosute us-rem deen. ¹¹ O
nak hun-ne ya'ag me ur-koob. O nak komo rem-us yo-se
se kumu me n-me b̄o-t̄o o-Antakiya, o-Ikoniya ne, o-Risiya
ne. O nak hun-ne ya'ag me ur-koob, amba um joosute,

* B̄or-us tet:8 3:8 Hyen komo: Rwu 7:11.

Wan-Koyan Yeso guug me be-de un ye kap.† ¹² Kap wu cone wu nom gon she'et-de Shir cone à, wu sher be-ur Kiristi Yeso, wua su ur-koob be-de un hun-ne. ¹³ Amba yan-men-ut jaas-to, un ya-ut-raks ne, she'et-de un ye ur-yo-de a do m-ha n-co n-co. Ye ro un raks un hun-ne, un ce un ye, a ye ut-raks. ¹⁴ Amba wo, senge m-sher be-de o-nip o a yoose wo à. O sher hur un du un o ne deen, remen o nepse ka ye yoose wo à, woa hoks wos ur-be un ye ne. ¹⁵ O nak Ma-to Shir cin da-o o ro'e wa rek-wu à. Ma-to Shir a hoks wo m'ya us-nap unze se o shereg ur-hur be-ur Kiristi Yeso, ka da-de ne wu he wo m-gwu. ¹⁶ Kap Ma-to Shir to ro gense à, to un rwuun be-de Shir. To ro un gwu ne be-ur na:

Be-de un yoose un hun-ne,
 un kwos un ye ba'ase ne à,
 un ja'as un ye nome ur-ba'as à,
 un yoose hun-ne bo ye he she'et-de ur-bon à.

¹⁷ Shir un ya'as na Ma-to un wu remen kap net-wu ro wu Shir à, wua ma'as zongse, wu nomot ko mo ke gon senge-mo ur-bon mo.

Bor-us nass

¹ Um mossute wo un Shir ne, un Kiristi Yeso ne. Baks wu he piishe un yan-hoog un margan-ne ut-ma à. Komo baks wu roon wu nomot ut-gwomo to un hono o-dak. ² Me, Burus, ro wo m-zee o ko'ot Ma-to Shir. Zonge o ko'ot Ma-to Shir, da-o hun-ne cone m-hoge à, komo un da-o ye cone ye hoge á. O rure hun-ne ye ja'as, da-o ye nome yo depe á, o kwos ye. O do ye jaab-o ut-men, ye senge un nom un rii so-yo. Nom ka rem-se un 'mo ur-hur, komo o ma'as ye m-yoose un Ma-to Shir. ³ Me wo m-rure un ka ma-to remen

† Bor-us tet:11 3:11 Hyen komo: Seng 13:14-52; Seng 14:1-7; Seng 14:8-20.

da-o r̄oon, o hun-ne a cun ye hoge yoos-de o-nip á. Amba yea n̄om rem-us ȳo-se se hur-de un ye cone à. Komo yea raks to-to un ye be-de yan-yoos-de ut-bo. Ka yoos-de ro ye m-rure yo to-to un ye cone m-hoge à. ⁴ Hun-ne a n̄om gop-de un hoge o-nip un Ma-to Shir á, amba yea ke to-to un ye be-de ut-zwom to o-hwaa. ⁵ Amba w̄o Timoti, o garamse hi un du koyanda. O 'mo ur-hur, da-o un sw̄o ur-koob. O n̄om senge-m̄o un ko-ya-m-Rwor un Ma-to m-Rerem, to Shir. O n̄om senge-m ru ur-bon ne, m̄o Shir ya'asu w̄o, o nom à.

⁶ Hoog-m re, a ya'aste m̄o untun ur-seke de m-swo be-de Shir. Da-o um he m-yage un m̄o ka hoog-m̄o à, nomoste. ⁷ Um sha'ag kashi ut-mur, um komog senge-m̄o Yeso Kiristi, yase me um n̄om à. Komo, um ma'aste m-bop un Ma-to m-Rerem kom-ut yoor. ⁸ M-moka Shir essute me 'yons-ur kashi n-ton o-shir, remen um sengute m-sher be-de un wu. Wan-Koyan wan-piish ut-ma wu o-nip, wua ya'as me ur-'yons un ka ho-de un piish ut-ma de. Me wu cot Wan-Koyan he m-ya'as un ka 'yons-de un hon-de á. Amba Shir a 'ye hun-ne ka 'yons-de, komo myet un ye ro ur-gop ye hyenet muun-m̄o un wu à.

Burus çonog Timoti gu wu

⁹ Timoti, koyan w̄o m-nom, o n̄om kyak, o haan be un de hor-m-hor. ¹⁰ Um çonog o haan remen Dimas wongute un me ne. Wu wongute un me remen gop-de un remse un hono o-dak. Wu neket̄e bo-o o-Tasaronika. Komo Kirezens Haag raag-o o-Garatiya. Titus komo wu haaru raag-o o-Darmatiya.* ¹¹ Ruka wu cot ro kan̄e un hon-de un wu be un de. O hoob Markus, n̄o haan n̄o un wu ne remen wua hoks me m-gu deen, n-me un senge-m re

* B̄or-us nass:10 4:10 Hyen komo: Koro 4:14; Pm̄on 24; 2Kor 8:23; Gara 2:3; Titu 1:4.

kane.† 12 Um tomog Tikokos ha-mo un bo-o o-Apisu.‡
 13 Da-o um she'ete un bo-o o-Toruwàs, um yagnute cop-o
o-huw un kom-ut Karbus. Hakkure, da-de o he m-haan à,
o deknũ mẽ o. Komo o deknũ mẽ takurda-ut re. Wo bopre
ka to a nome un ka-to un gwoor á.§

14 Ka ko-ya-o-pyap-wu Arekanda nomotu mẽ rem-us
yo-se. Wan-Koyan a top wu bo un rem-us yo-se se wu
nome à.* 15 Wo ma o nom ceen un wu ne, remen wu ro
ut-yage un yoos-ur na ne deen.

16 Da-de a taknu mẽ m-hante be-de un ko-wan-piish ut-
ma kane un bo-o o-Roma à, um ruute hi un de be-de un ye
ro mẽ us-cetente à, yatt-wu su'e mẽ á. Ye tukute mẽ o-
cin kap mo un ye. Um konog Shir sokse ye ka ba'as-de.

17 Myet un kaane ne, Wan-Koyan ro eso un mẽ ne. Wu
ya'ag mẽ ur-beeb, har um hokste ko'ot un ka Ma-to m-
Rerem to, to ma Yeso Kiristi. Hun-ne ye ro Yahuda-ne á ro
kane ye hogute to. Komo Wan-Koyan guug mẽ sa o zee wu
posse m-mar un nu-o o-zur à. 18 Um nepste Wan-Koyan
wua ruut mẽ un ko yo ke rii yo-yo yo. Wua 'er mẽ, wu
woot mẽ be-de un gwomo-to un wu to n-Ton o-shir. Yage
a bumut Wan-Koyan, har da-o ba m-ta! Amin.

Gas-de ur-kom

19 Hakkure o gassu mẽ Biskira, un campo un wu ne
Akira.

O gassu mẽ komo, yan-den-o Onesiporus ne.†

20 Erastus ro kon har m-moka n-mẽ bo-o o-Korinti,
komo um yagnute Taropimus n-mẽ bo-o o-Miritus wu

† B̄or-us nass:11 4:11 Hyen komo: Koro 4:14; Pm̄on 24; Seng 12:12,25; 13:13;
 15:37-39; Koro 4:10; Pm̄on 24. ‡ B̄or-us nass:12 4:12 Hyen komo: Seng

20:4; Apis 6:21-22; Koro 4:7-8. § B̄or-us nass:13 4:13 Hyen komo: Seng

20:6. * B̄or-us nass:14 4:14 Hyen komo: 1Tim 1:20; B̄ong 62:12; Roma 2:6.

† B̄or-us nass:19 4:19 Hyen komo: Seng 18:2; 2Tim 1:16-17.

piishe á.‡ ²¹ Koyan w̄o m-n̄om, o n̄om kyak, o haan be
ūn de rii-yo h̄uw-̄o wōonte. Or na ne yan-dor kap, r̄o
n̄o ur-gas. Yuburus ūn Pudens ne, ūn Rayinus ne, ūn
Karawudiya ne, ye r̄o n̄o ur-gas komo. ²² Wan-Koyan r̄o
ūn w̄o ne! Yar-m̄o Shir r̄o ūn n̄o ne!

‡ B̄or-̄us nass:20 4:20 Hyen komo: Seng 19:22; Roma 16:23; Seng 20:4; 21:29.

ut-Hun New Testament

Hun-Saare: ut-Hun New Testament New Testament

copyright © 2017 Wycliffe Bible Translators, Inc.

Language: Hun-Saare

Contributor: WBT Central Zone

© 2017 Wycliffe Bible Translators, Inc. in cooperation with the Ut-Hun Bible Translation Project All rights reserved. The New Testament in ut-Hun (Eastern Dukawa)

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 30 Nov 2021

4b40cd80-7cb8-5d3d-8563-557f030f99d7